

四庫全書

子部

欽定四庫全書

子部

山堂肆考卷一百二十一

詳校官中書臣閔思毅

主事臣祁韻士覆勘

總校官降調編修臣倉聖脉

校對官中書臣王鍾泰

謄錄監生臣趙希濬

欽定四庫全書

山堂肆考卷一百二十

明 彭大翼 撰

性行

嘲謔

下

述句致嫌

梁劉諒字求信彭城人秘書監孝綽之子少好學尤悉晉代故事號皮裏晉書為湘東王所善湘東眇一目一日與諒共遊江濱歎秋望之美諒曰今日可謂帝子降

于北渚湘東以為刺已因語諒曰卿言目眇眇而愁予耶由此嫌之按梁元帝初封湘東王

作賦釋罪

宋郭景初嘗夜出為醉人所誣太守召景初詰其狀景初笑曰謠所謂張公喫酒李公醉太守怪其言不屈命取紙筆使作張公喫酒李公醉賦郭操筆立就其略云事有不可測人當防未然何張公之飲酒乃李老之醉焉清河丈人方肆杯盤之樂隴西公子俄遭酩酊之愆

太守見而大笑乃釋之按郭朏字景初泉州人張公喫酒李公醉乃武則天時謠言張公者易之兄弟也李公者言王室也

多鬚被嘲

魏鍾毓鍾會兄弟穎悟絕人善於嘲戲毓嘗語會聞安陸能作調試共視之乃盛飾共載行至西門一女子笑曰車中央殊高二鍾都不覺車後一門生云向已被嘲鍾愕然門生曰中央高者兩頭瓶二鍾多鬚故以為戲

皆鬍誤認

宋孫巨源從劉貢父乞墨貢父遣吏送與誤達孫莘老中丞巨源以未得讓劉劉曰已送君矣後知孫莘老誤留以其皆孫而同為館職吏輩莫能別劉謂吏曰何不取其鬍為別吏曰皆鬍而莫能別劉曰既是皆鬍何不以身之大小為別于是館中以孫莘老為大鬍孫學士巨源為小鬍孫學士

有腸無腸

楊誠齋戲呼尤延之為蝤蛑延之呼楊為羊一日食羊
白腸延之曰秘監錦心綉腸亦為人所食楊笑吟曰有
腸可食何須恨猶勝無腸可食人世稱蟹類為無腸公
子一坐大笑

有尾無尾

東坡父子雜說父子浮于海夜泊島嶼中聞水下有人
哭聲復若人言遂聽之有曰昨日龍王有令一應水族
有尾者斬吾鼈也故懼誅而哭汝蝦蟆無尾何哭復聞

有言曰吾令幸無尾但恐更理會科斗時事也

皛飯毳飯

東坡嘗與劉貢父言某與舍弟習制科時日享三白食之甚美不復信世間有八珍也貢父問三白之說坡言是一撮鹽一碟生蘿蔔一盃飯貢父大笑久之以簡招坡喫皛飯坡不復省憶謂人云貢父讀書多必有出處比至赴食見案上所設惟蘆菔鹽飯而已始悟貢父以三白為戲援匕箸食之幾盡將上馬云明日可見過當

具毳飯奉待貢父雖知其為戲但不知毳飯所設何物
迨往談論過半午不設食貢父饑甚索飯坡云少待如
此者再三坡答如故貢父曰饑不可忍矣坡徐曰鹽也
毛蘆菔也毛飯也毛非毳飯而何貢父捧腹曰固知君
必報東門之役然慮不及此坡始命進食抵暮而去一
說是蜀人郭震任介之事至今俗呼無曰毛

唐裝晉裝

宋翟伯壽好奇巾服一如唐人自名唐裝一日往見許

彥周彥周髽髻著犢鼻襪躡高屐出迎伯壽愕然彥周
徐曰吾晉裝也公何怪按張峩翁貴耳集翟者年字伯
壽公異叅政之子能清言工篆及八分書

密雲旱雷

有人詣謝公別謝公流涕此人了不悲既去左右曰向
客殊自密雲謝公曰非徒密雲乃自旱雷耳

霖雨短畧

宋林瑀王淶同作直講林謂王曰何相見之踈濶也王

曰遭此霖雨瑞云今後轉更踈濶王曰何故答云逢此
短晷益譏王之侏儒

座主沙門

宋張亢性滑稽有門客作坤厚德載物賦云粵有大德
其名曰坤亢戲曰非講經之座主即傳法之沙門

雄名艾氣

劉貢父與王汾同在館中汾病口吃貢父贊曰恐是昌
家又疑非類未間雄名只有艾氣按周昌韓非揚雄鄧

父皆口吃者

馬默驢鳴

劉貢父熙寧中為試官出臨以教思無窮論舉人上請曰此卦大象如何放曰要見大象當詣南御苑時馬默為臺官彈奏放輕薄不當置在史館放曰旣云馬默豈合驢鳴按馬默字處厚單州城武人家貧徒步從石介學將歸石語諸生曰馬君他日必為名臣

馬兄驢弟

王氏聞見錄馬涓舊唐名士唐帝幸梁涓扈蹕焉至漢中詔除眉州刺史赴任至蜀阻兵被偽蜀王氏強縻于幕中然涓恃才傲物甚不相洽且知王氏有異圖或贈繒帛必鎖櫃中題云贓物王雖知之憐其文藝強為優容時或忤旨數揖出院欲逼殺之而涓無懼色後朱梁遣使致書于蜀命諸從事韋莊輩具草答之皆不愜意左右曰何妨命前察判為之王氏不得已迎請復職使亟修迴復涓一筆而成大稱旨于是復聚前歡因召諸

廳同宴飲次消斂社曰偶記一詰欲對大王陳之可乎
王許之曰消少年多游謁諸侯每行必廣齋書策驢駄
之馬亦駄之初戒途驢叱哮跳躡與馬爭路而先莫之
能制行半日後抵一坡力疲足憊遍體汗流迴顧馬曰
馬兄馬兄吾去不得也可為弟搭取文書馬兄諾之遂
併在馬上却迴顧驢曰驢弟我謂你有多少伎倆畢竟
還搭在我老兄身上蜀主大笑同幕皆遭凌謔

曾子避席

宋呂嘉問字望之提舉市易三司使曾布劾其違法荆公惑黨人之說反以罪三司曾既罷朝請而嘉問治事如故劉攽聞而嘆曰豈意曾子避席望之儼然乎

道民借輿

志林施道民為孫威敏所黜既而復得為民借小字軍人肩輿而出曾子固見之曰好一隻夾註轎子聞者絕倒

作令取象

唐姚巖傑崇之孫與盧肇會飲于江亭肇作令欲目前取象一聯即發令曰遠望漁舟不澗尺八姚遽飲酒一器凭欄嘔噦須臾即席還令曰凭欄一吐已覺空喉按唐逸史開元末一僧徃終南將回寺中一老僧令于空房內取尺八來乃玉笛也謂曰汝主在寺以愛吹尺八謫在人間此其所常吹者也汝可將此付汝主僧歸進于玄宗吹之宛是先所御者又孫夷中仙隱傳房介然專吹竹笛名尺八

撤樂敗歡

宋乾道中衆客赴郡宴爾日伎樂甚盛一年少男子見色甫就席中一客以服辭乃撤樂勸酬次少年責此人曰敗一席之歡者爾也真所謂不自殞滅禍延過客者耶賓主為之哄堂

嘲禁釀酒

曹操欲制酒禁孔融以書嘲之曰天垂酒星之曜地列酒泉之郡克不千鍾無以建太平孔非百榦無以堪上

聖樊噲解卮鴻門非酒無以奮其怒趙之廝養東迎其
主非酒無以激其氣高祖非醉斬蛇無以暢其靈景帝
非醉幸唐姬無以開中興袁盎非醇醪無以脫其命定
國不酣飲一斛無以決其法故酈生以高陽酒徒著功
于漢屈原不餚糟歠醨取困于楚由是觀之酒何負于
政哉

戲不飲酒

苕溪漁隱蘇東坡戲徐君猷孟高之皆不飲酒詩曰孟

嘉嗜酒桓溫笑徐邈狂言孟德疑公獨未知其味爾臣
令時復一中之風流自有高人識通介寧隨薄俗移二
子有靈應撫掌吾孫還有獨醒時

子瞻從衆

蘇長公在維揚一日設客十餘人皆一時名士米元章
亦在坐酒半元章忽起立自贊曰世人皆以芾為顛請
質之子瞻長公笑答曰吾從衆

延之移人

宋尤延之與楊誠齋為金石交淳熙中誠齋為秘書監
延之為太常卿又同為青宮察察二公皆善謳延之一
日言有一經句請秘監對曰楊氏為我誠齋應聲曰尤
物移人衆皆嘆其敏確

活剥生吞

容齋筆記唐李義府詩鏤月為歌扇裁雲作舞衣同時
人張懷慶竊為已作各增兩字生情鏤月為歌扇出性
裁雲作舞衣故當時有活剥生吞之謂

逆取順守

宋吳敏字元中在辟雍時試經義五篇盡用王氏字說據援精博蔡京為進呈特免過省以為學說之勸及作相請復春秋科反攻王氏徐擇之時為左相語人曰吳相此舉雖湯武不能過客不解擇之曰逆取而順守元中甚不平

遂厄陳蔡之間

蔡絛鐵圍山叢談翟參政公巽字汝文與蔡安世靖陳

應賢邦光同在門下省安世位在汝文之上應賢在其
下汝文每共談論二人交闊之一日辭屈汝文曰嗟乎
遂厄于陳蔡之間

幸免瀟湘之沒

宋元符中上巳日錫燕從臣命御新龍舟蔡元長忽墜
于金明池萬衆喧駭蔡得浮木憑出遂入次舍一身淋
漓蔣顥叔之奇唁公曰幸免瀟湘之沒蔡大笑答曰幾

同洛浦之遊

看天穿地

唐河中尹姜師度好為溝洫所在必發衆穿鑿先是太史令傳孝忠善占星緯故人為之語曰傳孝忠兩眼看天姜師度一心穿地

穴處巢居

宋熙寧間王拱辰即洛之道德坊營第其後中堂起屋三層最上曰朝元閣時司馬君實亦在洛私第穿地深丈餘作秘室邵堯夫見富鄭公鄭公問洛有何新事堯

夫曰近有一巢居一穴處者遂以二公對富為發笑

豈敢望獅

石中立天禧中為員外郎時西域獻獅子畜于御苑日給羊肉十五斤石率同僚往觀或曰吾輩忝與郎曹反不及一獸石曰汝何不知分彼乃苑中獅子吾曹員外狼耳安可並耶

豈可禍免

東坡父子雜說趙以馬服君之威名擢其子括為將以

拒秦而適當武安君白起一戰軍破掠趙括坑其衆四十萬邯鄲幾拔父子聞之曰昔有人將獵而不識鶻買一鳧而去原上兔起擲之使擊鳧不能飛投于地又再擲又投于地至三四鳧忽踴跚而人語曰我鴨也殺而食之乃其分奈何加我以抵擲之苦乎其人曰我謂爾為鶻可以獵免乃鴨耶鳧舉掌示人笑而言曰看我這腳手可以擗兔否

賈盧相戲

文酒清話宋賈黃中為相盧多遜作參一日府畿有蝗
蟲盧曰某聞乃賈蝗蟲賈曰某亦聞不傷稼但蘆多損
耳

劉王相嘲

劉攽嘲王觀云汝何故見賣王答曰賣汝直甚分文又
王汾嘗嘲攽云常朝多喚子蓋嘗朝知班吏多云班班
謂之喚班攽應聲曰寒食每呼君

熱熟顏回

倦游錄陳繹字叔和為舉子時通率少檢後舉制科驟為質朴時號熱熟顏回後熙寧中台州推官孔文仲舉制科庭試對策言天下事有可痛哭太息者執政惡而黜之繹時為翰林學士語人曰文仲狂躁真杜園賈誼也王平甫聞之笑曰杜園賈誼可對熱熟顏回合坐大喙

鄙俚孫通

孫公談圃司馬溫公薨適當明堂大饗朝臣以致齋不

及奠肆赦畢蘇子瞻率同輩以往而程頤固爭引論語子于是日哭則不歌以止其行子瞻曰明堂乃吉禮不可謂歌則不哭也頤又諭司馬諸孤不得受弔子瞻戲曰頤可謂燠糟鄙俚叔孫通也聞者笑之

戲上官泌

宋石中立滑稽有上官泌郎中勸之慎口對曰下官口干上官鼻何事

戲沈存中

宋沈括字存中為內翰劉貢父與從官數人同訪之始
下馬典謁者報云內翰方在盆中就浴可少待貢父語
同行者曰存中死矣待之何益衆問其故貢父曰孟子
云死矣盆成括衆方悟其為戲

作詩戲德建

宋楊德建號湖陰先生丹陽陳輔每清明過金陵上塚
即過先生居清談終日率以為常元豐辛酉癸亥頻歲
訪之不遇題一絕于門曰北山松粉未飄花白下風清

日脚斜身是舊時王謝燕
一年一度到君家湖陰歸見
其詩吟賞久之曾稱于王荆公
公笑曰此正戲君為尋常百姓耳
湖陰亦大笑

解書戲荆公

志林王介甫多思而善鑒時出一新說已而悟其非也
則又出一說以解之嘗與劉貢父共食輶筯而問曰孔
不徹薑食何也貢父曰本草生薑食多損智道非明民
將以愚之孔子以道教人者也故不徹薑食所以愚之

也介甫欣然而笑久之乃悟其戲已也貢父雖戲言然
王氏之學實大類此

舊太公

御史臺記辛郁字太公弱冠遇太宗于行所上問何人
對曰辛太公上曰何如舊太公郁曰舊太公八十始遇
文王臣今年適十八已遇陛下過之遠矣上遂命直史

館

真郭郎

宋政和丙申殿試何稟為狀元潘良貴次之皆年少有風貌而第三人郭少友頗古怪唱名日呵出御街觀者皆曰狀元真何郎榜眼真潘郎第三人真郭郎也

陳惡蔡衰

宋陳少卿亞維揚人善詩滑稽尤甚嘗與蔡君謨會于僧舍君謨題詩屏間曰陳亞有心終是惡亞即索筆對曰蔡襄無口便成衰

盛肥丁瘦

宋盛文肅公度字公量豐肌大腹而眉目清秀于晉公謂踈瘦如削二公皆兩浙人並以文詞知名于時梅學士詢性喜焚香每晨起視事必焚香兩爐以公服罩之撮其袖以出時有寶文賓者五代漢宰相正固之孫也以名家子有文行為館職而不喜修飾經時未嘗沐浴時人語曰盛肥丁瘦梅香寶臭

文鑒頭閒

古今詩話張逸字密學知成都僧文鑒求見時華陽簿

張唐輔同在客次唐輔欲搔首方脫烏巾睥睨文鑒置于其首文鑒大怒訴于張公公問其故唐輔曰某方頭痒取下幞頭無處頓放見大師頭閒權頓少時不意箕怒也

貢父鼻陷

后山叢談世以癩疾鼻陷為死證劉貢父晚有此疾蘇子瞻戲之曰予少壯讀書頗知故事孔子嘗出顏仲二子行而過市遇其師子路趨捷躍而升木顏淵懦緩顧

無所之就市中刑人所經幢避之所謂石幢子也既去
市人以為賢者所至不得復呼故名遂共謂避孔塔坐
者絕倒

王導調僧淵

世說康僧淵目深而鼻高王丞相每調之僧淵曰鼻者
面之山目者面之淵山不高則不靈淵不深則不清

中立戲盛度

宋盛度體豐肥一日自前殿趨出宰相在後盛初不知

忽見卽欲趨避行百餘步乃得直舍隱于其中石中立
見其喘甚問之盛告其故石曰相公問否盛曰不問別
去十餘步乃悟罵曰奴乃以我為牛又章郇公得象與
中立素相友善而石嘗戲章云昔時名畫有戴松牛韓
幹馬而今又有章得象也

正好掉頭

宋紹興辛巳葛王篡位使來脩好命洪景盧往報之入
境與其伴使約用敵國禮故沿路表章皆用在京舊式

未幾乃盡却回使依近例景盧不可于是扃驛門絕供
饋不得食者一日景盧懼留易表章授之供饋乃如禮
景盧素有風疾頭常微掉時人為之語曰一日之饑禁
不得蘇武當年十九秋寄語天朝洪奉使好掉頭時不
掉頭

方為吐氣

元趙魏公有一私印曰水晶宮道人周草窓以瑪瑙寺
行者對之魏公遂不用此印後見草窓同郡崔進之藥

肆懸一牌曰養生主藥室魏公以敢死軍醫人對之進之亦不復設此牌魏公語人曰今日方為水晶宮吐氣按趙子昂字孟頫封魏公周密字公謹號草窻

嘲無學識

有錢唐葉生為太學官無學識有學士假作葉策題云孝經一序義亦難明如韋昭王是何代之主先儒嶺是何處之山孔子之志四時常有也何以獨言吾志在春孔子之孝四時常行也何以獨言秋行在孝既曰夫子

沒而又何有鯉趨而過庭

嘲好詰難

營丘有士性不通慧每事好折難而不中理一日造艾子問曰大車之下與橐駆之項多綴鈴鐸其故何也艾子曰車駕之為物甚大且多夜行忽狹路相逢則難于迴避以藉鳴聲相聞使預得迴避矣營丘士曰佛塔之上亦設鈴鐸豈謂塔上夜行而使相避耶艾子曰凡鳥鵲多高巢以糞穢狼藉故塔之設鈴所以警鳥鵲也豈

與車駘比耶營丘士曰鷹鵠之尾亦設小鈴安有鳥鵲
巢于鷹鵠之尾乎艾子大笑曰怪哉君之不通也夫鷹
隼擊物或入林中而絆足縞線偶為木枝所綰則振羽
之際聞鈴聲可尋而索也豈謂防鳥鵲之巢乎營丘士
曰吾嘗見挽郎東鐸而歌雖不究其理今乃知恐為木
枝所綰而便于尋索也但不知挽郎之足用皮乎用絺
乎父子慍而答曰挽郎乃死者之導也為死人生前好
詰難故鼓鐸而樂其尸爾

裁堪半丁

晉習鑿齒以腳疾廢居里巷苻堅滅樊鄧素聞鑿齒名與釋道安並致焉與語大悅以其蹇疾裁堪半丁堅與諸鎮書曰晉氏平吳利在二俊今破漢南得士一人半耳

可謂連璧

齊王儉與王敬則同拜三公徐孝嗣于崇禮門候儉因嘲之曰今日可謂連璧儉曰不意老子與韓非同傳

誦賦相戲

宋楊大年初與客圍棋石資政中立自外至坐于一隅
大年因誦賈誼鵬賦以戲之云止于坐隅貌甚閒暇石
遽答曰口不能言請對以臆

屬對為戲

聖宋掇遺魯宗道直龍圖閣時濟陽公方用事一日魯
以公事造其第盤辟之際丁即曰學士拜時衫窣地魯
應聲曰侍中宴處幕漫天時丁有異心神悸膽劙殆不

能支

嘲趨時好

倦游錄歐陽永叔在政府以詩寄汝陰隱士常秩曰笑殺汝陰常處士十年騎馬聽朝雞既而王介甫秉政以右正言直史館召秩秩遂起有無名子改前詩曰昔日汝陰常處士却來馬上聽朝雞秩舊治春秋著講解十卷自謂聖人之意盡在是矣介甫不好春秋秩遂諱其所學熙寧六年兩河荒歉詔令青苗本錢權行倚閣王

介甫戲秩曰公之春秋亦倚閣乎

嘲畜古器

秦士有好古物者價雖貴必購之一日有人持敗席一
幅踵門而告曰昔魯哀公命席以問孔子此孔子所坐
之席也秦士大愜以為古遂以負郭之田易之踰時又
有持枯竹一枝告之曰孔子之席去今未遠而予以田
售吾此杖乃古公避狄杖策去邠時所操也蓋先孔子
又數百年矣子何以償我秦士大喜因傾家貲悉與之

已而又有持巧漆椀一隻曰席與杖皆周時物固未為
古也此椀乃舜造漆器時作蓋又遠于周矣子何以償
我秦士愈以為遠遂虛所居之宅以予之三器既得而
田宅資用盡去致無以為衣食然好古之心終未忍捨
三器于是披哀公之席持太王之杖執舜所作之椀行
丐於市曰衣食父母有太公九府錢乞一文

嘲文難深

宋景文修唐史好以艱深之辭文淺易之說歐陽公思

有以訓之一日大書其壁曰宵寐匪禎札闥洪休宋見之曰非夜夢不祥題門大吉耶何必求異如此歐公曰李靖傳云震霆無暇掩聰亦是此類也景文慙而改之按宋祁謚景文嘗與歐公同修唐書李靖傳乃景文所作也

嘲文粗俗

楊大年嘗戒其門人為文宜避粗俗語既而公作表云伏惟陛下德邁九皇門人鄭戩遽請于公曰未審何時

得賣生菜于是公大笑而易之

嘲好色

唐司空圖詩昨日流鶯今日蟬起來又是夕陽天六龍飛轡長相窘更忍乘危自着鞭蓋戒以色自戕者也又宋楊誠齋戲謂好色者曰閻羅王未曾相喚子乃自求抑到何也

嘲好飲

父子好飲少醒日門生相與謀曰此不可不諫止唯以

險事休之宜可誠一日父子大飲而噦門人密袖彘腸
置噦中持以示曰凡人具五臟方能活今公因飲而去
一臟止四臟矣何以生耶父子熟視而笑曰唐三藏猶
可活况四臟乎

耳不成聰

宋郭忠恕嘲司業聶崇義曰近貴全為贊攀龍只是聾
雖然三箇耳其奈不成聰蓋以聶姓為戲也崇義即答
云勿笑有三耳全勝蓄二心謂忠恕也

口不足信

隋唐嘉話李二十六丈丞相善謔為夏口時有客辭焉丞相留更住三兩日客曰業已行矣船已在漢口丞相曰此漢口不足信其客掩口而退

嘲殺風景

西清詩話李義山雜纂品目數十蓋以文滑稽者其一曰殺風景謂清泉濯足花下曬禪背山起樓燒琴煮鶴對花啜茶松下喝道晏元獻慶歷中罷相守頽以患山

泉烹日注置酒賦詩曰稽山薪茗綠如烟靜挈都監煮
惠泉未向人間殺風景更持醪醕醉花前又王荊公元
豐末居金陵大漕蔣之奇夜謁公于蔣山騶唱甚都公
取松下喝道語作詩戲之曰扶襄南陌望長楸燈火如
星滿地流但怪傳呼殺風景豈知禪客夜相投自此殺
風景之語頗傳于世

嘲好水利

王荊公好言水利有小人諂曰決梁山湖八百里水以

為田其利大矣荆公喜甚徐曰策固善決水何地可容劉貢父在坐中曰自其旁鑿八百里湖則可容矣荆公笑而止

因人品加號

宋孝武狎侮羣臣短長肥瘦各有比擬顏師伯缺齒號曰齶劉秀之儉吝號曰老慳宗靈秀體肥每一集會賜器服飲食欲其占謝傾踣以為歡王玄謨太原人亦受老儉之目

因姓名為謎

夷堅志元祐間士大夫好事者取達官姓名為詩謎如長空雪霧見虹蜺行盡天涯遇帝畿天子手中持玉簡秀才不肯着麻衣謂韓絳馮京王珪曾布也又云人人皆戴子瞻帽君實新來轉一官門狀送還王介甫潞公身上不曾寒謂仲長統司馬遷謝安石溫彥博也又遜齋閒覽或傳一詩謎云佳人佯醉索人扶露出胷中似雪膚走入綉幃尋不見任他風雨滿江湖乃賈島李白

羅隱潘閬四詩人也

作啓賀友

輟耕錄陸伯麟側室育子友人陸象翁以啓戲賀之曰
犯簾前禁尋竈下盟玉雖種于藍田珠將還于合浦移
夜半驚鶯之步幾度驚惶得天上麒麟之兒這回喝采
既可續詩書禮樂之脉深嗅得油鹽醬醋之香按東坡
嘗咏婢謔詞有揭起裙兒一陣油鹽醬醋香之句故象
翁用之

作文別妻

輒耕錄錢唐道士洪丹谷與一妓通因娶為室病且革顧謂洪曰妾死在旦夕卿須自執薪還肯作一轉語乎夫妾歌兒也卿能集曲調于妾未死時使預聞之雖死無憾矣洪固滑稽輕佻者遂作文曰二十年前我共伊只因彼此太癡迷忽然四大相離後你是何人我是誰恭惟某人秀鍾谷水聲遏楚雲玉交枝堅一片心錦纏道餘二十載遽成如夢令休憶少年遊哭相思兩手託

空意難忘一筆勾斷且道如何是一筆勾斷孝順歌終
無孝順逍遙樂永遠逍遙聽畢一笑而卒

着綠着朱

則天嘗問張元一曰近日在外有何笑事元一對曰朱
前宜着綠陸仁傑着朱問知微騎馬馬吉甫騎驢將名
作姓李千里將姓作名吳楊吾

裹紙裹布

唐時益州每歲進柑子皆以紙裹之長吏嫌紙不敬代

以細布既而恐柑子為布所損每懷憂懼俄有御史甘子布使于蜀驛吏馳白長吏有御史甘子布至長吏以為推布裹柑子事懼曰果為所推及子布到驛長吏但叙以布裹柑子為故子布初不知久而方悟聞者大笑

起風下雨

宋陳恭公知揚州陳少卿亞曰近作一謎四箇腳子直上四箇腳子直下經年度歲不曾下若下時不是風起便是雨下公未曉亞曰乃待制廳上茶牀苟或設譙即

慳值風澁值雨也此譏不常設讌者

弔喪監厨

或問補衡曰苟文若趙稚長云何曰文若可借面弔喪稚長可使監厨請客苟儀容憔悴故可弔喪趙腹大噉肉故可監厨

嘲生員

宋時嘲生員十七字詩聖駕臨璧雍諸生盡鞠躬頭烏
身上白米蟲按宋生員皆穿白衣故云我朝初年亦同

至洪武壬午二十四年方命易玉色

戲縣丞

會稽有富人馬生以入粟得官號殿幹喜賓客有美姬能歌時出佐酒客有梁縣丞者頗黠因與之目成後馬生殂梁捐金得之他日置酒觴客陳無損益之在坐酒酣舉杯屬梁曰有儻語奉上梁諦聽之即琅然高唱曰昔居殿幹之家爰喪其馬令入縣丞之室無逝我梁一坐大笑梁慄然不樂未幾病死

山堂肆考卷一百二十

欽定四庫全書

山堂肆考卷一百二十一 明 彭大翼 撰

文學

經術

事物紀原太昊畫八卦易之始也又有網罟之歌詩之始也伏羲神農黃帝堯舜之書謂之三墳書之始也易始八卦而文王益為六十四故曰周易濟南伏生以書為上古之書故曰尚書二毛公傳詩名家而

鄭康成箋之故曰毛詩禮之為經有三周禮一書固禮之綱領至其儀法度數則儀禮乃其本經而禮記其義疏也五經之內分周禮儀禮禮記為七經而七經之外又益以孝經論語為九經以春秋分三傳為三合孝經論語為一于是有十經焉以六經加六綿於是有十二經焉以詩易書三禮春秋三傳加孝經語益爾雅謂之十三經焉秦焚六籍書亡其半詩亡六篇春秋偶完易以卜筮得全而禮樂之書無復遺文

矣

連山歸藏

已下
易經

自伏羲畫卦之後而易道著夏有連山商有歸藏周文王為彖辭周公為爻辭孔子為十翼十翼謂上下彖上下象上下繫文言說卦序卦雜卦也

彖卦象爻

易之彖象二字皆假獸以名之也蓋彖為大彖行則俯首一望而全體皆見故統論一卦之體象有六牙故取

以喻六爻之象

易傳田何

史記自魯商瞿受易孔子孔子卒瞿傳易六世至齊人
田何字子莊而漢興田何傳東武人王同子仲子仲傳
菑川人楊何何以易徵官至中大夫齊人即墨成以易
至城陽相廣川人孟但以易為太子門大夫魯人周霸
莒人衡胡臨菑主父偃皆以易至二千石

易出丁寬

漢景帝時丁寬為梁孝王將軍拒吳楚號丁將軍作易說三萬言今小章句是也初寬從田何授易寬授田王孫王孫授施讎益喜梁丘賀由是易有施益梁丘之學又高相治易專說陰陽災異自言出於丁將軍相又傳授子康以明易為郎

受京房易

漢梁丘賀從京房受易年老傳於子臨為黃門郎甘露中奉使問諸儒于石渠琅琊王吉通五經聞臨說善之

時宣帝選高才郎十人從臨講經吉乃使其子郎中駿上疏從臨受易

傳孟喜易

洼丹字子玉世傳孟氏易漢建武初為大鴻臚作易通論七篇世號洼君易家宗之稱為大儒按孟氏即孟喜也從田王孫受易好自稱譽故易有施孟梁丘之學

子行鏗鏗

漢楊政字子行從代郡范升受梁丘易善說經京師語

曰說經鏗鏗楊子行

五鹿獄獄

五鹿充宗為梁丘易元帝令與諸易家論易諸儒莫能抗有薦魯人朱雲者召入論難連日充宗遂屈諸儒語曰五鹿獄獄朱雲折其角

九師傳

漢淮南王聘九人明易傳道訓二十篇號九師易文中子曰九師興而易道微三傳作而春秋散三傳謂公穀

左三傳也

六丁取

見雷

仲翔注易

吳志虞翻字仲翔與孔北海書示以易注孔答曰聞延陵之理樂覩虞子之治易乃知東南之美非徒會稽之竹箭也

要理講易

梁書馬樞字要理梁邵陵王綸為南徐州引為學士時邵陵自講大品令要理講維摩老子周易同日發題俗道聽者二千人

袁滋問易

宋程頤父珦嘗守廣漢頤與兄顥皆隨侍嘗遊成都見治箋箆筩者挾策就視之則易也箋者問曰君嘗學此乎因論未濟男之窮曰三陽失位也頤兄弟渙然有悟後袁滋問易于頤頤曰易學在蜀滋後見賣醬薛翁于

眉邛間與語大有所得蓋箇叟醬翁皆蜀之隱君子也

伊川著易

紹聖間程伊川削籍竄涪居白巖注易淵源所漸皆為名士胡憲劉勉之求得其書皆潛抄默誦夜以繼日又聞涪陵熊定受易學於頤即往從受業焉

毛亨詁訓

已下
詩經

昔孔子刪詩上取商下取魯凡三百一十一篇至秦滅學詩亡六篇存者三百五篇初孔子以詩授卜商商為

之序以授魯人曾申曾申授魏人李克李克授魯人孟仲子孟仲子授魯人根牟子根牟子授趙人荀卿荀卿授漢人魯國毛亨作詁訓傳以授趙國毛萇時人謂亨為大毛公萇為小毛公

鄭玄注解

東漢鄭玄字康成取毛氏詁訓所不及異同者續之為注解謂之曰箋箋薦也言薦成毛意

言詩于魯

史記言詩于魯則申培公申公魯人也高祖過魯申公入見於魯南宮呂后時游學長安與劉郢同師已而郢為楚王令申公傳其太子戊戊不好學疾申公及郢卒戊立為王胥靡申公公恥之歸魯退居家教終身不出門注云胥靡腐刑也

言詩于齊

史記言詩于齊則轍固生于燕則韓太傅固齊人也孝景時為博士與黃生爭論帝前帝以為廉直拜清河王

太傅久之病免武帝卽位復以賢良徵自是諸齊人以詩顯貴皆固弟子也又燕人韓嬰言詩見國子博士

詩授元帝

魯詩有張唐許氏之學張生兄子游卿為諫議大夫以詩授元帝其門人琅琊王扶為泗水中尉陳留許晏為博士

詩諫昌邑

見王府官

韋氏學

漢韋賢治詩事博士大江公及許生官至丞相傳於子玄成以詩為淮陽中尉講論石渠亦至相及兄子賞以詩授哀帝由是魯詩有韋氏學

翟氏學

翟酺字子超四世以詩學相傳漢安帝朝詔六百石試對政事酺對第一拜尚書

匡衡解頤

匡衡字稚圭家貧好學善說詩諸儒語曰無說詩匡鼎來匡說詩解人頤鼎衡小名也衡射策中甲科補平原文學

曼卿得旨

初九江謝曼卿善毛詩衛宏從之受學因作毛詩序得風雅之旨

治齊詩

蕭何之字長倩治齊詩射策甲科為郎伏黷字稚父明

齊詩其子恭字叔齊少傳父學為劇令故北州有伏氏
學肅宗以為三老又景鸞字漢伯能理齊詩施氏易作
易及詩解

習韓詩

夏恭字敬公習韓詩孟氏易門徒千餘人漢光武時遷

泰山都尉

古文尚書

已下
書經

魯恭王壞孔子故宅于壁中得古文尚書論語悉以書

還孔氏武帝乃詔孔安國定其書作傳義五十八篇書成後遭巫蠱事不行至魏晉之際榮陽鄭冲私于人間得而傳之東晉汝南梅頤奏上始列於學宮此古文尚書也

今文尚書

漢伏生為尚書傳四十一篇傳與歐陽生及大小夏侯者是曰今文尚書歐陽教千乘倪寬寬以文學應郡舉詣博士受業於孔安國孔氏有古文尚書而安國以今

文讀之因以起其家是曰今文尚書又按伏生名勝濟
南人以治尚書傳至九世孫湛相襲為名儒取爵位故
世有伏氏學勝又以書教同郡張生及千乘歐陽生歐
陽生授同郡倪寬寬授歐陽生之子世世相傳至曾孫
歐陽高高孫地餘及八世孫歛皆為博士故世有歐陽
氏學張生授夏侯都尉都尉授族子始昌始昌授族子
勝是為大夏侯氏學勝傳從兄子建是為小夏侯氏學
又孔子之後孔鮒之弟子襄生忠忠生武及安國武生

延年延年生霸霸生光襄為惠帝博士安國延年皆為
武帝博士霸亦昭帝末為博士光為成帝博士皆治尚
書伏勝字子賤湛字惠公歐陽生字和伯高字子陽地
餘字長賓欽字王思

執經壘畔

見門弟

講經澤中

東漢楊倫通古文尚書不應州郡辟講授于大澤中

獄中受書

見獄繫

御前講書

東漢張酺字孟侯少從父充受尚書永平九年顯宗為四姓小侯開學于南宮置五經師酺以尚書數講於御前以論難當意除為郎

王尊治書

漢王尊治尚書論語舉直言遷號令

賈復習書

東漢賈復字君文少好學習尚書事舞陰李生李生奇之曰賈君容貌志氣如此將相之器有折衝千里之威

左丘明傳春秋

已下
春秋

左丘明魯人因春秋作傳世謂之左傳杜預云仲尼為素王丘明為素臣宋元豐中詔從祀孔子廟庭封瑕丘伯初孔子授春秋于卜商又授之弟子公羊高穀梁赤又各為之傳今公羊穀梁二傳是也

公孫弘學春秋

史記公孫弘者齊菑川國薛縣人字季少時為薛獄吏年四十餘乃學春秋雜說武帝元光五年有詔徵文學弘至太常太常令所徵儒各對策百餘人弘第居下策奏天子擢弘對為第一

言春秋于齊

史記孝景時胡母生為博士以老歸教授齊魯之間言春秋者多受胡母生公孫弘亦頗受焉按胡母姓也字

子都齊人

言春秋于趙

見業師

為穀梁

史記瑕丘江生為穀梁春秋自公孫弘得用嘗集比其
義卒用董仲舒

習公羊

東漢丁恭字子然習公羊嚴氏春秋教授數百人建武

中遷少府諸生自遠方至者千人世稱大儒又北史高允好公羊春秋

作左氏傳解

東漢服虔字子慎作春秋左傳解舉孝廉後拜九江太守晉杜預作左傳注解武帝封當陽侯

著左氏條例

穎容字子嚴善左氏春秋著左氏條例舉孝廉不就又鄭衆字仲師從父受左氏春秋兼通易詩知名當世延

篤字叔堅受左氏傳有名京師

鄭玄起廢

東漢何休字邵公任城樊人靈帝朝陳蕃辟之為諫議大夫以春秋駁漢事六百餘事與其師博士羊弼追述李育意以難三傳作公羊墨守左氏膏肓穀梁廢疾鄭玄乃作發墨守鍼膏肓起廢疾休見之嘆曰康成入吾室操吾戈矛以伐我

元感振滯

唐王元感武后朝為四門博士撰書糾繆春秋振滯禮
繩愆等數百篇魏知古見其書嘆曰五經指南也

以春秋義正獄

史記董仲舒弟子遂者蘭陵褚大廣川殷忠溫呂步舒
褚大至梁相步舒至長史持節使決淮南獄於諸侯擅
專斷不報以春秋之義正之天子皆以為是弟子遂者
至于命大夫為郎謁者掌故者以百數而仲舒子孫皆
以學至大官

以春秋義斷獄

見京尹

嚴顏學

見門弟

鄭賈學

漢世言左氏春秋者多祖于鄭興而賈逵自傳其父業故世有鄭賈之學按逵字景伯平陵人父名徽嘗從劉歆受左氏春秋而逵又傳父之業也

晚學春秋

史記主父偃者臨菑人學長短縱橫之術晚乃學易春秋百家言游齊諸生間莫能厚遇也孝武元光元年上書闕下朝奏暮召謂曰公安在何相見之晚乃拜為郎中數上書言事拜為謁者一歲中四遷

少習春秋

東漢張玄少習顏氏春秋建武初遷陳倉縣丞清淨無欲專心經書方其講論時終日不食及有與辨難者輒

舉數家之說令擇所從又崔駰字亭伯亦東漢人年十
三通春秋詩易與班固傳毅齊名

以春秋為博士

漢疏廣以春秋徵為博士後徙太子太傅

以春秋補縣尉

漢梅福明尚書穀梁春秋補南昌尉

以春秋射策

漢翟方進受春秋以射策為郎

以春秋擢第

唐劉蕡字去華明春秋擢進士第後舉賢良方正直言

極諫

鍾繇屈嚴翰

嚴翰字公仲善公羊鍾繇字元常好左氏謂公羊為賣餅人家數嘗與翰辯析長短翰口訥遂屈無以應繇曰公羊高竟服左丘明矣

日用折平一

唐崔日用自言明左氏春秋他日學士大集日用折武平一曰君文章固耐久若言經則敗績矣

傳春秋學

唐陸淳字伯冲明春秋師事趙啖盡傳二家之學順宗時為太子侍讀門人以其能文聖人之書通于後世私謚曰文通先生因避太子名改名質史氏謂其有功于春秋名在八司馬之冠

上春秋傳

自王安石廢春秋不列于學宮胡安國謂先聖手所筆削之書而人主不得聞講說學士不得相傳習亂倫滅紀用夷變夏殆由於此因潛心二十餘年著春秋傳以成其志至是上之高宗謂深得聖人之旨詔進一官命未下而卒

周公制禮

已下
禮經

周禮作於周公其建官以六典其取民以什其教民以鄉遂其養士以學校其威民以肉刑其公天下以封

建其制田以井邑溝洫其聯民以比閭族黨次而冠婚
喪祭之文以至服食器用之度微而羽毛鱗介之形以
至蟲狸鼈龜之類無不竭心力以為之經畫區處各當
而後已漢時有李氏者得周官上河間獻王獨缺冬官
一篇遂取考工記以補其缺合成六篇奏之至王莽時
劉歆信之以為周公致太平之迹始置博士其書遂行
于世杜子春受業于歆因以教授自是馬融作周官傳
註以授鄭玄玄作周官註略蘇綽王通皆尊信之唯何

休以為戰國陰謀之書林存孝以為瀆亂不經之說歐陽氏疑其設官太多陳氏疑其與周官不合蘇轍有三不可信之評胡五峰有無一官完善之論

高堂言禮

史記禮固自孔子時而其經不具至秦焚書亡散益多於今獨有士禮魯高堂生能言之孝文時魯徐生善為容為禮官大夫傳子至孫徐延徐襄襄以容為漢禮官大夫至廣陵內史延及徐氏弟子公戶滿意桓生單次

皆常為漢禮官大夫而瑕丘蕭奮以禮為淮陽太守是後能言禮為容者由徐氏焉按高堂生所傳士禮乃儀禮中士相見禮也公戶姓滿意名單姓次名魏時高堂隆即高堂生之後也

曹褒傳禮

東漢曹褒字叔通父充傳慶氏禮為博士褒結髮傳父業亦徵拜博士博物識古為儒者宗教授諸生千餘人

后蒼授禮

禮記者本孔門弟子共撰所聞也後儒各有損益子思乃作中庸公孫尼子作緇衣漢文帝時博士作王制其餘衆篇皆如此例至宣帝時東海孟卿事蕭奮以禮授后蒼而后蒼說禮于曲臺殿撰禮一百八十篇名曰后氏曲臺記后蒼復傳于梁國戴德及德從子聖德乃刪后氏記為八十五篇名大戴禮聖又刪大戴禮為四十六篇名小戴禮其後諸儒又加月令明堂位樂記三篇凡四十九篇則今之禮記是也德為信都王太傅授禮

于琅琊徐良游卿聖以博士講論石渠授禮于梁人橋
仁季卿楊榮按曲臺殿在未央宮中

孫弘記禮

孔子弟子各述所聞以為書名曰禮記然議之者曰曲
禮論撰于曲臺而不及五經之大義王制著述于博士
而盡失先王之大體月令出于呂不韋叙秦世之官繙
衣作于公孫尼子改魯論之文儒行皆遊說誇大之語
經解多易經緯書之文而樂記一篇司馬遷以為公孫

弘所記他皆錯雜出自漢儒之言也

劉向叙禮

漢河間獻王得仲尼弟子及後學者所記一百三十一
篇上之至劉向考校經籍檢得前篇因第叙之又得明
堂陰陽三十三篇孔子三朝記七篇王氏史氏記二十
一篇樂記三篇凡五種合二百四十篇

多識容典

唐歸崇敬治禮學多識容典

闇記義宗

唐孔穎達字仲達能闇記三禮義宗大厯中舉明經高第

就質疑晦

唐王紘字方慶善禮學嘗就徐堅質疑晦堅為申釋每得所未聞許益容字公範有禮學每所折衷咸得其正

淹識古今

唐王彥威淹識古今典禮作曲臺新記

伊川熟禮

朱子語錄東坡見程伊川主司馬文正之喪譏其父在
何以學得喪禮如此之熟有人遂為伊川解說道伊川
曾丁母艱也不消如此說人自少讀書如禮記儀禮便
都已理會了古人謂居喪讀喪禮亦平時理會了到這
時更把來理一番不是至居喪始來理會

文公編禮

朱文公編儀禮上篇曰士冠禮士昏禮士相見禮鄉飲

酒禮鄉射禮燕禮大射禮聘禮公食大夫禮觀禮下篇
曰喪禮士喪禮既夕禮士虞禮特牲饋食禮少牢饋食
禮按儀禮是經禮記是解且如儀禮有冠禮禮記便有
冠義儀禮有昏禮禮記便有昏義以至燕射之類莫不
皆然只是儀禮有士相見禮禮記却無士相見義至宋
劉原父補成一篇亦只是解他儀禮

周官集說

宋陳傅良字君舉永嘉人有周官講義集說林之奇字

少穎三山人有全解楊恪字謹仲永嘉人有辯疑

周官補遺

元英宗泰定中清源丘葵吉甫周禮序聖朝新制以六經取士乃置周官于不用使天下之士習周禮者皆棄而習他經毋乃以冬官之缺為不全書耶夫冬官未嘗缺也雜出于五官之中漢儒考古不深遂以考工記補之至宋淳熙間臨川俞廷椿始著復古篇新安朱氏一見以為冬官不亡考索甚當自鄭賈以來皆當斂衽退

三舍也嘉熙間永嘉王次點又作周官補遺由是周禮六官始得為全書按廷椿字壽翁次點字與之

顏芝所藏

己下孝經

孝經孔子為曾子陳孝道而作也遭秦皇焚書為河間人顏芝所藏漢初芝子貞出之凡十八章而長孫氏與博士江翁少府后蒼諫議大夫翼奉安昌侯張禹皆以此名家按芝所藏者謂之今文孝經鄭玄主今文而陸澄則譏之

安國為傳

古文孝經與古文尚書同出經文大略相似只多閨門一章又有衍出三章并前合為二十二章孔安國為傳

至隋王邵于京師得孔傳劉炫因序其得喪講明之議者以為閨門一章多相排毀宋司馬光始取古文為之

指解

張禹兼通

已下
論語

論語有齊魯齊論多于魯論二篇曰問王知道是也初

傳魯論者龔奮夏侯勝韋賢蕭望之張禹皆名家禹初授魯論晚講齊論周氏包氏為之章句馬融又為之訓

鄭玄參考

齊論之外又有古論語與魯論不異惟分子張為二故有二十一篇玄以張論為本參考齊論古論而為之注陳羣王肅皆為義說何晏有集解至朱子集註行而諸家皆廢矣

註于趙岐

已下
孟子

孟子註于趙岐而陸善經宗之岐分為四十四篇陸合為七篇其音釋則張謐丁公著也

刪于馮休

宋馮休以軻書有叛經者作刪孟二卷前乎休而非軻者荀卿刺軻者王充後乎休而疑軻者溫公與軻辨者東坡又虞允文以溫公作疑孟及李泰伯鄭厚叔皆有非孟之言故作尊益辨五卷

成于子夏 已下

爾雅

爾雅倡于周公而成于子夏誠九流之奧旨也中道寔
微世罕聞之

辨于終軍

自漢終軍豹鼠之辨爾雅之書始行郭景純究心一十
八載而草木魚蟲訓詁名物昭然畢舉考古之學其彬
彬焉

五經無對

已下各經

漢陸大聰敏博學于五經最精熟館中謁之石經人為

語曰五經無對有陸人

五經無雙

東漢許慎字叔重南召陵人少博學馬融常推敬之時人語曰五經無雙許叔重舉孝廉為洨長初慎以五經傳說臧否不同撰為五經異義又作說文解字十四篇傳于世

遺受七經

索隱曰文翁遣司馬相如受七經

典領五經

漢劉歆字子駿向第三子也好古篤學成帝綏和中王莽薦為侍中更名秀上詔令秀典領五經卒父前業秀于是總羣書而為七略曰輯略六藝略諸子略詩賦略兵書略術數略方技畧其叙諸子分為九流曰儒曰道曰陰陽曰法曰名曰墨曰縱橫曰雜曰農

五經紛紜

東漢井丹字大春通五經善談論京師語曰五經紛紜

井大春

五經縱橫

東漢周舉字宣光博學洽聞為儒者所宗京師語曰五
經縱橫周宣光舉茂才為平丘令上書言得失詞甚切
正拜尚書名重朝廷遷諫大夫又遷侍中

徧習五經

梁卞華字昭雅徧習五經為五經博士

徧誦五經

梁武帝太子統生五歲能偏誦五經

通涉六經

劉峻字孝標辨命論云近世沛國劉瓔與弟璡竝一時秀士也瓔則關西孔子通涉六經璡則志烈秋霜心貞

崑玉

釐正五經

唐顏師古名籀少博覽精訓詁太宗嘗嘆五經去聖愈遠傳習寢訛詔師古于秘書省考定五經多所釐正

研綜五經

魏常夾字仕明少聰敏嚴正五經百家多所研綜置館溫水之右教授門徒七百餘人號為儒林先生高允稱之曰文翁柔勝先生剛克立教雖殊成人一也

默誦六經

宋張九成字子韶號無垢八歲默誦六經

定五經正義

唐太宗貞觀十四年辛國子監以師說多門章句煩雜

命孔穎達與諸儒定五經疏謂之正義令學者習之

著九經要義

宋魏了翁在靖州湖湘江浙之士負書從學因著九經要義

五經及第

唐殷侑貞元中以五經及第

九經及第

宋孫奭字宗古博平人幼好學徙居鄆之項城舉九經

及第為國子監直講

論定五經

東漢明帝詔丁鴻與諸儒論定五經同異于北宮白虎
觀帝親制臨決鴻才高論難最明帝數嗟嘆時人語曰
殿中無雙丁孝公

註脚六經

宋陸九淵字子靜乾道中登第呂東萊識其文于數千
人中或勸其著書答曰學苟知道六經皆我註脚也



山堂肆考卷一百二十一

欽定四庫全書

子部

山堂肆考卷一百二十二

詳校官中書臣閔思毅

主事臣祁韻士覆勘

總校官降調編修臣倉聖脉

校對官中書臣王鍾泰

謄錄監生臣趙希濟

欽定四庫全書

山堂肆考卷一百二十二 明 彭大翼 撰

文學

著書上

漢太史公自叙曰昔西伯拘于羑里演周易則著書之始也宋劉器之曰孔子年六十八歲乃始刪詩定書繫周易作春秋蓋是時學問成矣涉世深矣故其述作始可為萬世法古人著書者多在晚年蓋為此

也博物志聖人制作曰經賢者著述曰傳

國語

周魯齊晉鄭楚吳越八國語也宋氏謂左氏書而朱子則謂後人所為也唐柳子厚嘗作非國語或謂子厚平生作文得國語最深因知其短長而持之故謂子厚為沒前程

家語

孔子家語總目自相魯至公西赤共四十四篇獻堂王

廣謀句解

管子書

齊管仲名夷吾字敬仲著管子五十八篇經緯備具而尤以禮義廉耻為重

墨子書

墨子名翟宋人貴儉兼愛尚賢明鬼非命尚同所著有墨子十六卷自親士至雜守凡六十一篇

慎子書

慎子名到趙人與彭蒙田駢為友學墨子弟子禽滑釐之術又好黃老道德因序其指意著十二論至漢劉向所定慎子書則有四十一篇

孫子書

戰國孫武子作兵法宋儒謂武子十三篇文士亦當盡心

晏子春秋

晏平仲名嬰菜之夷維人著書六篇名晏子春秋漢劉

向序云其書六篇皆忠諫其君文章可觀義理可法有
合六經之義

呂氏春秋

呂不韋陽翟人秦莊襄王時為相封文信侯作月令及集
所聞為十二紀八覽六論合十餘萬言名曰呂氏春秋
著書五千言

老子西遊至函谷關關令尹喜曰子將隱矣強為我著
書于是著上下篇言道德之意共五千言而去

著書十萬言

莊周字子休睢陽蒙縣人與孟子同時著書十萬言自分為三內篇七外篇十五雜篇一大率皆寓言其洸洋自恣以適已也名曰南華真經

列子書

列禦寇鄭人自云居鄭圃四十年人無識者其學本於黃帝老子著書自天瑞至說符共八篇大抵多寓言與莊子相類非秦漢而下作者所可及

荀子書

荀子名況尊稱曰卿後避漢宣諱號孫卿著書數萬言
羽翼六經

太玄法言

漢揚雄家貧好學以經莫大於易作太玄以傳莫大于論語作法言史莫善于蒼頡作訓纂箴莫大於虞箴作九箴賦莫深于離騷作反騷又著書自學行至孝至共十三篇行世按反騷者摭離騷文而反之自岷山投諸

江以弔屈原故名

元經中說

隋王通為蜀郡司戶書佐大業末棄官歸居河汾以著
書講學為業作元經中說董常程元房玄齡杜如晦魏
徵之屬咸北面受王佐之道

王鈴

王鈴呂尚兵書也及尚死葬之失尸所在惟有王鈴六

篇在棺中

王杯

漢董仲舒所著有玉杯繁露清明竹林等數十篇皆假託一物以名書也如漢魏人所為文有名連珠者相似西京雜記仲舒夢蛟龍入懷故作繁露詞宋程大昌字泰之又因仲舒繁露之作作演繁露

爾雅

或謂爾雅周公所作爾近也雅正也或謂爾雅有張仲孝友之文張仲宣王時人非周公所制也至揚子雲又

謂孔子弟子游夏之徒所記以解六藝者劉歆西京雜記家君以為外戚傳史佚教其子以爾雅又記言孔子教魯哀公學爾雅則爾雅之來遠矣舊傳學者皆言周公所記為是張仲孝友之類乃後人所足耳

埤雅

宋陸佃字農卿山陰人因外補事簡政清得專意論譔既注爾雅更為此書言為爾雅之輔也子宰作序

韓非說林

韓非韓之諸公子與李斯俱事荀卿善刑名法律之學作說難孤憤五蠹說林五十六篇

劉向說苑

劉向漢楚元王之後成帝初遷光祿大夫所著有新序說苑別錄諸書

離騷

屈原楚同姓仕于懷王為三閭大夫同列大夫上官靳尚害其能共譖毀之王乃流屈原原作離騷經不忍以

清白居濁世赴汨羅自投而死

鴻烈

漢淮南王安著鴻烈二十一篇鴻大也烈明也言大明
禮教也號淮南子高誘注

著雋永

荀通論戰國說士權變又自序其說凡八十一首號雋
永雋肥肉也永長也言所論甘美而義深長也

言刑名

西京雜記公孫弘著公孫子言刑名事謂一字直百金

風俗通

漢應劭字仲安汝南人刪定律令著漢官儀又撰風俗通以辨物類名號其自序云風者天氣有寒煖地形有陰陽泉水有美惡草木有剛柔俗者含血之類象天氣地形泉水草木而生之千里不同風百里不同俗

地理考

宋王應麟字伯厚鄞縣人有地理考困學記聞玉海諸

書行世嘉祐初進士官至翰林學士禮部尚書

韓詩外傳

見經術

楚詞後語

宋晁補之撰補之字無咎宗慤之曾孫也

白虎通

漢世諸儒集論經傳奏之白虎觀因名白虎通

白獮髓

宋張仲文撰

華陽國志

益州古梁州之城北拒華山之陽南拒黑水故常璩叙蜀事而謂之華陽國志

武陵圖志

南北朝伍安貧武陵人博雅好學梁主累降玄纁之禮招之皆辭以疾不赴嘗撰武陵圖志

雞肋集

宋晁補之七歲能屬文王安國見而奇之嘗著雞肋集
一百卷又宋景文有雞跖集按淮南子善學者若齊王
之食雞必食其跖數千而後足景文集名本此

鳳髓集

元陳巖字清隱青陽人累舉不第汗漫江湖嘗集杜甫
詩句為鳳髓集

許慎說文

漢許慎字叔重南召陵人著五經異議說文解字十四

篇行世獻帝時舉孝廉

荀悅申鑒

東漢荀悅字仲豫潁川人官至秘書監侍中時政移曹氏作申鑒五篇奏之又依左傳體刪漢書為漢紀三十篇

焦氏易林

漢梁人焦延壽作延壽嘗從孟喜學易授之京房分六十四卦更直日用事以風雨寒暑為候元帝朝為三老

遵世易林

吳遵世南北朝渤海人以易占知名文襄即位除中舍
所著有易林雜占百餘卷

三國名臣序

袁宏字彦伯陳郡人為東郡守作三國名臣序贊三國
魏吳蜀也

列國名臣傳

宋眉山人王當嘗舉進士不中退居田野著春秋列國

名臣傳五十卷元祐中蘇軾薦為賢良方正廷對慷慨
不避權貴

陸賈新語

漢高祖謂中大夫陸賈曰試為我著秦所以失天下吾
所以得之者及古成敗之國賈乃粗述存亡之徵凡著
十二篇每奏一篇帝未嘗不稱善號其書曰新語

義慶新語

南宋臨川王義慶采擷漢晉以來佳事佳話為世說新

語又唐潯陽縣主簿劉肅撰唐世說新語

吳越春秋

東漢山陰人趙燧從杜撫受韓詩嘗著吳越春秋等書
蔡邕見之嘆息以為長于論衡

漢晉春秋

晉習鑿齒襄陽人習郁之後博學洽聞情才秀逸桓溫
辟為從事累遷別駕溫覲覲非望鑿齒著漢晉春秋凡五

十四卷以裁正之

拾遺記

王子年拾遺記晉安陽王嘉撰

博物志

晉張華字茂先讀書三十車作博物志四百卷武帝以為煩改作十卷

論衡

東漢王充字仲壬上虞人著論衡八十五篇蔡邕入吳得之秘玩以為譚助後王朗得其書時稱其才進或曰

不見異人當得異書問之果以論衡之益

譚圃

孫公譚圃高郵孫升撰皆言宋太祖以後事

西京雜記

漢劉歆字子駿王莽篡漢歆為國師嘗著西京雜記

西陲要略

唐范傳正元和中與崔立之同時有西陲要略三卷

山海經

晉郭璞字景純聞喜人博學高才撰洞林新林卜韻爾
雅又著山海經方言等書

區宇志

隋大業初勅內史舍人竇威崔祖濬及龍川贊治侯偉
等三十餘人撰區宇志一部共五百餘卷新成奏之上
見其屬辭比事全失修撰之意不悅遣舍人柳達宣勅
責之即日勅遣秘書學士十八人修十郡志以內史侍
郎虞世基總檢及成奏之帝曰學士修書頗得人意各

賜帛二十段又宋樂史所著有太平寰宇記等書

風土記

晉周處字子隱膂力過人不修細行嘗作默語及風土記

歲時記

梁宗慤字元慤少聰敏鄉里呼為小兒學士元帝鎮荊州令兼記室嘗撰荆楚歲時記

三輔決錄

東漢趙岐長陵人嘗與兄襲得罪中常侍唐衡避禍北
海唐死乃出徵拜議郎嘗著孟子章句及三輔決錄

五代通錄

宋范質宋城人宋太祖稱為真宰相所著有五代通錄
共九十餘卷又質初為後唐時進士後周累官平章事
左僕射及宋祖陳橋之立質謂讓之具陳禪讓之禮封
魯國公

玉燭寶典

杜臺卿曲陽人隋初拜著作郎嘗采月令推廣之為書

十二卷名玉燭寶典

玉冊金文

老子以長生術授令尹喜曰千日之外尋我于蜀中青
羊之肆至期果見于大官李氏之家授喜以玉冊金文
賜以文始先生之號

政本書

宋林勲賀州人政和間為廣州教授建炎中獻政本書

十三篇書奏以勲為桂林節度使掌書記

鹵簿圖

宋綬宋趙州平棘人敏求之父真宗時賜進士累官資政殿學士所撰有鹵簿圖十卷

族姓昭穆

晉摯虞長安人武帝時歷秘書監衛尉卿撰文帝志四卷族姓昭穆十卷

師友淵源

宋呂本中性清約工詩詞所著有師友淵源錄春秋解

賈山至言

賈山涉獵書記漢文帝時上書言治亂之道借秦為喻
名曰至言又賈誼所著名曰新書

桓譚新論

漢桓譚字君山沛國相人成帝時為大樂令光武時拜
議郎上疏陳時政帝方欲以讞決疑譚極言非經出為
六安郡丞著書言當世行事號新論

長統昌言

漢仲長統每論說古今及時俗行事輒發憤嘆息因著論名昌言凡三十四篇

父子離說

蘇東坡居士著

示兒編

孫奕字季昭有示兒編

平蠻記

宋狄青西河人仁宗朝西夏叛青為延州指揮使敵望之如神後又討平儂智高拜樞密使所著有平蠻記戰陣圖

玉海集

南北朝吳縣人張融字思光玩涉百家弱冠有名宋時起為參軍厯封溪令入為御史中丞性至孝所著有玉海集褚司徒問其義張答曰玉以比德海崇上善

香山集

宋義烏人喻良能官至太常寺丞嘗進忠義傳二十卷
孝宗深加嘆賞即命頒行以開國縣男致仕所著又有
諸經講義及香山等集

西州清話

三國陸瑁遜弟也仕吳為議郎選曹尚書其子喜仕吳
累官吏部尚書少好學嘗作言道等書及西州清話

東岡小藁

元許熙載湯陰人開義學以教鄉人所著有東岡小藁

荆臺集

宋陵州貴平人孫光憲少好學遊荆渚高從誨署為從事累官秘書監太祖時授黃州刺史聚書數千卷自號葆光子所著有荆臺集等書

廬江集

宋何涉南充人自六經百家及山經地志醫卜之術無所不學為人長厚未嘗譚人過失所著有春秋本旨廬

江集七十卷

皇王大紀

宋胡安國子宏嘗師楊中立侯師聖優游南山下者二十餘年所著有皇王大紀諸書

將帥要略

宋胡旦濱州渤海人喜讀書既喪明猶使人誦經史隱几聽之著漢春秋五代史略將帥要略演聖通論唐二家傳三百餘卷

竹溪詩集

宋萬頃宋新建人有孝行節操學問粹然一出於正登淳熙進士為樂平簿累遷大理司直力求外補差江西撫幹所著有竹溪詩集

梅溪文集

宋王十朋樂清人號梅溪幼穎悟日頌數千言所著有梅溪文集朱文公為序

杜陽雜編

唐武功蘇鷁撰

酉陽雜俎

唐段成式字柯古文昌之子會昌時人博學強記多奇
篇秘籍嘗宦遊至辰著酉陽雜俎書數十篇

北堂書抄

唐虞世南為秘書于省後堂集羣書中事可為文用者號
北堂書抄

東都事略

宋戴栩有學行所著有東都事略等書朱子語錄云東

都事略如陳無已不見章子厚不著趙挺之綿襖此等
好處俱不曾載

杜佑通典

唐劉秩字祚卿詳摭百家倣周書六官為政典三十五
篇房琯稱其才過劉向杜君卿佑以為未盡又叅益新
禮為二百篇自號通典奏之優詔嘉美

齊丘化書

宋齊丘萬載人仕南唐拜相乞歸九華山賜號九華先

生著化書理訓各十卷

初學記

唐徐堅字元固開元初為集賢學士討集故事兼前文

詞撰初學記

近思錄

宋朱晦庵葬母祝氏於建陽縣西太湖之陽即建寒泉
精舍于此淳熙中呂祖謙來訪即與之共編次近思錄

禮經會元

宋仁和葉時與朱文公友善所著有禮經會元竹埜詩集

大學衍義

宋真德秀著

搜神記

晉干寶著晉紀二十卷直而能婉時稱良史又作搜神記三十卷人謂鬼之董狐干一作于

述異記

梁任昉著述異記唐李翺著卓異記薛用弱著集異記

五代陶穀著清異錄

五經正義

唐祭酒孔穎達撰

四書闕疑

金真定人贍思著四書闕疑五經思問等書

法象書

唐李淳風岐州雍人貞觀初直太史局制渾天儀著法

象書七篇上之累遷太史令以勞封昌樂縣男

幽怪錄

唐牛僧孺著

塵缶集

宋叙州宣化人程公許嘉定中進士後以寶章閣學士知隆興府所著有塵缶集按缶瓦器更蒙之以塵則叩之而不鳴矣喻文不工也

香奩集

唐韓偓字致光萬年人有香奩集一卷李端叔酷喜之
誦其序云咀五色之靈芝香生九竅咽三危之瑞露美
動七情

峴山編

唐崑山尉劉綺莊研窮古今博考傳記作類書一百卷
號崑山編

闡苑記

宋何求闡中人以宋涉隆苑記疎畧乃裒次三十卷號

閻婉記

三體詩

汝陽周伯弼選

百家選

宋王荊公編

貴耳集

宋張端義撰

指掌圖

元胡炳文婺源人所著有春秋集解禮書纂述大學指掌圖五經會義爾雅韻語雲峰筆記世稱雲峯先生

傳信記

唐鄭綮作開天傳信記以國朝故事莫盛于開元天寶之際因搜求遺逸傳于必信故名云

貽謀錄

宋晉陽王棟撰

容齋隨筆

宋洪邁字景虛號容齋皓季子也所著有容齋隨筆合四十七卷及夷堅志按夷堅人名列子論鯤鵬夷堅聞而志之容齋因作夷堅志

雲海弊帚

宋之才宋永嘉人政和中從楊時學性怡靜操履潔白自號雲海居士有雲海弊帚五十卷

資暇集

隴西李濟翁編

臥遊錄

見山

精金訓鑒

宋貴池人葉楠為鄱陽尉所著有知非集精金訓鑒童

蒙記凡八十卷

合璧事類

宋膠庠進士建安謝維新去咎編

北山移文

見隱士

東園叢說

宋嘉興崇德人李如篪為桐鄉縣丞博聞強識靡不通貫所著有東園叢說及樂書

唐史贊疏

宋陳宓官至直秘閣著春秋三傳抄唐史贊疏等稿

唐詩鼓吹

元遺山編代人郝天挺註

傳燈錄

蘇州僧道元纘佛祖及近世名人禪語為傳燈錄三十卷以進詔刻板傳布

揮麈錄

宋楊萬里編

古今注

晉崔豹字正熊所著有古今注一輿服二都邑三音樂四鳥獸五魚蟲六草木七雜註八問答釋義漢服虔亦

著此書

聞見錄

宋邵伯溫字子文有邵氏聞見錄及河南集皇極觀物
諸解

玉照新志

宋王明清汝陰人慶元間寓居嘉興官至朝郎有史才
所著有揮麈錄及玉照新志

鐵園叢談

宋蔡絛撰鐵圍山叢譚

江南別錄

宋陳彭年撰

滹南遺藁

金王若虛真定府藁城人承安初進士所著有滹南遺藁

事文類聚

宋祝穆新安人以朱熹母黨隨寓建寧府建安縣博涉

經史所著有事文類聚方輿勝覽

藝文類聚

唐歐陽率更詢著

山堂考索

宋金華人章如愚自號山堂慶元間登第仕至國子博士所著有山堂考索

淮海語錄

宋淳熙間有僧元肇號淮海能詩文有淮海語錄及詩

集傳世

晏殊類要

晏殊宋臨川人所著有類要及二府集臨川集

晦庵語錄

朱文公著

石林燕語

宋葉夢得松陽人徙居湖州號石林先生所著有石林

避暑錄及燕語行世

澠水燕譚

宋王聖塗字闢之著澠水燕譚

中朝故事

唐尉遲偓纂

藥城遺言

蘇子由封藥城伯所著有藥城遺言又有藥城集

笠澤叢書

唐陸龜蒙寓居松江甫里與皮日休羅隱吳融為益友

著吳興寶錄四十卷松陵集十卷笠澤叢書三卷

賢闡漫錄

宋東陽何淡嘉定中以上舍釋褐歷官國子丞秘書郎
所著有通鑑手抄賢闡漫錄

次莊樂府

唐劉次莊作

張率文衡

南北朝吳縣人張率性簡重寬雅善屬文梁天監中嘗

爲待詔賦武帝勅曰相如工而不敏枚臯速而不工卿
兼之矣官至黃門侍郎所著有文衡十五卷

批鱗集

宋清江人朱景文乾道中進士再調分宜薄所著有批
鱗集五十篇

窺豹篇

宋楊文公從子紘為文公後賜進士聚書數萬卷所著
有窺豹篇

鄴侯外傳

唐李泌字長源德宗時拜相封鄴侯有集二十一卷行

世號鄴侯外傳

武侯通傳

戴羽元德安人隱居積學徵辟不就著武侯通傳三卷

史評一卷

詩苑類格

唐李淑著

樂府解題

唐吳競著

諫苑

樂運字承業嘗錄夏商以來諫諍事集而部之曰諫苑

奏上隋文帝嘉之

諫苑

宋楊億大年著

高士傳

南北朝平原劉杳晉嵇康唐皇甫謐各著高士傳

列女傳

漢劉向作列女傳八篇

顏氏家訓

南北朝顏協之子之推所著有顏氏家訓

呂氏鄉約

宋呂大鈞大忠弟初從學張橫渠後卒業于二程所著有四書註及鄉約

瑞山往鑑

金臺城楊伯雄舉進士為右補闕初顯宗在東宮伯雄為少詹事嘗集古太子賢不肖為書號瑞山往鑑上進之獨見嘉納

瀛海殘篇

宋河間人權邦彦崇寧中上舍登第累官簽書樞密院嘗獻十議以圖中興尋兼權叅知政事有餘藁十卷號

瀛海殘編

端禮日程

宋程端禮蘄縣人宋季皆尊尚陸氏學端禮獨從史蒙卿遊以傳朱子明體適用之指所著有讀書日程

冷齋夜話

僧惠洪新昌人字覺範俗姓彭氏注金剛楞嚴經旁通書史與陳了翁黃山谷為友所著有甘露集林間錄冷齋夜話天厨禁臠

翰墨全書

宋建陽熊禾為寧州司戶叅軍入元不仕好學至老不倦有標題四書及輯翰墨全書行世

兵機要略

宋洪州人何蒙著兵機要略十卷

斜川集

宋蘇過軾子也所著有孔門弟子別傳斜川集

慶湖集

宋衛州人賀鑄字方回元祐中累官泗州通判又倅太

平州工詩詞晚號慶湖遺老所著有慶湖集

輿地志

南北朝顧野王吳郡人精記博識仕陳領著作掌史事後為黃門郎光祿卿所著有玉篇及輿地志國史記傳

海岱志

南北朝崔慰祖東武城人仕宋為始安王記室嘗作海岱志起太公迄西晉人物為四十卷未成而卒

養性書

漢王充晚年著養性論十六篇裁節嗜慾

陳情表

見祖父祖母

桂苑叢珠

隋曹憲博學公卿多從之游煬帝令與諸儒撰桂苑叢珠及文正廣雅學者稱之

韻府羣玉

元陰幼遇奉新人五世同居家數百口讀書講學八歲

中九經科著韻府羣玉行世

聯珠集

唐竇羣唐德宗時以處士徵為右拾遺二兄常牟二弟庠輩俱擢進士為郎工詞章號聯珠集義取若五星然也輩與人言如不出口號囁嚅翁

漱玉集

宋趙明誠妻李易安夫亡再適張汝舟能詩詞有漱玉

集三卷

花萼集

唐李乂字尚貞兄尚一俱以文章名世其所作同為一集號李氏花萼集

芻蕘策

宋史通青神人與兄珣以文學知名歷官通州尉磐石令嘗著易書乾坤別解又進世要機務芻蕘策各十卷

鹽鐵論

桓寬漢汝南人博通經傳推演鹽鐵之議著數萬言以

成一家之法

金石錄

宋趙明誠著又曾子固集古今篆刻為金石錄五百卷

戰國策

元泰定中金華吳師道戰國策校注序先秦之書惟戰國策最古文最訛舛自劉向校定已病之南豐曾鞏再校亦疑其不可考者後漢高誘為注宋尚書郎括蒼鮑彪詆其疎畧謬妄乃序次章條補正脫誤時出已見論

說其用意甚勤愚嘗竝取二書而讀之高氏之疎畧信矣然事莫大于存古學莫善于闡疑而鮑乃直去本文徑加改字豈傳疑存舊之意哉

職方乘

宋洪芻南昌人師民之子朋之弟也舉進士為諫議大夫所著有職方乘老圃集

神異經

東方朔著

物理論

楊泉著

禮記據拾

南齊金華婁幼瑜不應徵辟著禮記據拾三十卷

綱目發明

宋尹起莘著

山堂肆考卷一百二十二